



SIARAN MEDIA

KEMAS LAHIRKAN GENERASI AL-QURAN SEAWAL USIA TIGA TAHUN MELALUI MODUL THALATHA TIS'A

Jabatan Kemajuan Masyarakat (KEMAS) akan memperluaskan pelaksanaan pendidikan awal berteraskan nilai Islam melalui pengenalan Modul Thalatha Tis'a yang menyasarkan kanak-kanak berumur tiga tahun di Taman Asuhan Kanak-kanak (TASKA) seluruh negara mulai Julai ini.

Modul ini merupakan perluasan kepada program Pra Tahfiz yang telah diperkenalkan sejak tahun 2023 di TABIKA KEMAS oleh YAB Datuk Seri Dr Ahmad Zahid Hamidi, Timbalan Perdana Menteri yang juga Menteri Kemajuan Desa dan Wilayah bagi kanak-kanak berumur lima hingga enam tahun.

Pelaksanaan Modul Thalatha Tis'a di TASKA KEMAS tahun ini mencerminkan komitmen berterusan KEMAS dalam memperkukuh pendidikan Islam dan pembentukan generasi penerus sejak peringkat usia awal. Modul ini dirangka secara sistematik merangkumi pengenalan huruf hijaiyyah dan hafazan surah-surah pendek yang disesuaikan dengan tahap perkembangan kanak-kanak seawal usia tiga tahun.

Dalam pelaksanaannya, KEMAS menggunakan modul pembangunan kandungan yang dibangunkan oleh Universiti Pendidikan Sultan Idris (UPSI), Tanjung Malim. Pada masa yang sama, teknik pembelajaran dari Indonesia turut digarap dan diintegrasikan secara terpilih bagi memastikan kaedah penyampaian lebih sesuai dengan keperluan perkembangan usia kanak-kanak.

Pelaksanaan rintis Modul Thalatha Tis'a telah bermula di beberapa kawasan terpilih antaranya Besut, Hulu Terengganu dan Dungun. KEMAS dijadual memulakan pelaksanaan modul ini mulai Julai 2025 di TASKA KEMAS yang beroperasi dalam bangunan Kementerian Kemajuan Desa dan Wilayah (KKDW) sebelum diperluaskan secara berperingkat ke seluruh negara.

Untuk rekod, KEMAS ketika ini mengendalikan sejumlah 577 kelas TASKA yang menempatkan seramai 11,015 orang kanak-kanak berumur antara 2 hingga 4 tahun di seluruh Malaysia sekaligus menyediakan ruang dan potensi besar bagi pengukuhan pendidikan awal Islam melalui pelaksanaan modul ini.

Langkah ini merupakan antara strategi signifikan dalam usaha membentuk jatidiri dan sahsiah kanak-kanak luar bandar dengan matlamat melahirkan generasi al-Quran yang berakhlak mulia dan berdaya saing, selaras dengan agenda memperkasa pendidikan awal secara menyeluruh di bawah kerangka Malaysia MADANI.

Jabatan Kemajuan Masyarakat (KEMAS)

Tarikh : 19 Jun 2025

No. Rujukan : KEMAS.100-9/1/3 (18)